

- Mvua za Chini ya Wastani hadi Wastani zinatarajiwa katika mikoa ya Kigoma, Tabora, Katavi, Singida na Dodoma na Wastani hadi Chini ya Wastani katika mikoa ya Njombe, Iringa, Mbeya, Songwe, Rukwa, Ruvuma, Mtwara na Lindi pamoja na kusini mwa mkoa wa Morogoro. Vipindi virefu vya ukavu na mtawanyiko wa mvua usioridhisha vinatarajiwa katika maeneo mengi.
- Mvua zinatarajiwa kuanza kati ya wiki ya tatu na ya nne ya mwezi Oktoba, 2025 katika mikoa ya Tabora, Katavi na Kigoma; na kusambaa katika mikoa ya Rukwa, Songwe, Mbeya, Iringa, Njombe pamoja na kusini mwa mkoa wa Morogoro kati ya wiki ya pili na ya tatu ya mwezi Novemba, 2025 na kuisha kati ya wiki ya nne ya mwezi Aprili na wiki ya kwanza ya mwezi Mei 2026 katika maeneo mengi. Kipindi cha nusu ya pili ya msimu (Februari-Aprili, 2026) kinatarajiwa kuwa na ongezeko la mvua ikilinganishwa na nusu ya kwanza (Novemba, 2025-Januari, 2026).
- Mvua za Chini ya Wastani zinazotarajiwa katika maeneo mengi zinaweza zikasababisha upungufu wa unyevu wa udongo na kuathiri ukuaji na maendeleo ya mazao na kupunguza mavuno hususani kwa mazao yanayotegemea mvua.

MIFUMO YA HALI YA HEWA KWA KIPINDI CHA MSIMU WA MVUA CHA NOVEMBA, 2025 HADI APRILI, 2026

Joto la Bahari la wastani hadi chini ya wastani linatarajiwa katika eneo la Tropiki ya kati ya Bahari ya Pacific. Aidha, joto la Bahari la wastani linatarajiwa magharibi mwa Bahari ya Hindi (Pwani ya Afrika Mashariki) ikilinganishwa na juu ya wastani upande wa mashariki. Hali hii inatarajiwa kupunguza kasi ya msukumo wa hewa yenye unyevunyevu kutoka Bahari ya Hindi kuelekea maeneo ya ukanda wa pwani ya nchi yetu pamoja na maeneo ya jirani na hivyo kupunguza nguvu ya mifumo isababishayo mvua katika maeneo hayo.

Vilevile, joto la Bahari la wastani hadi juu ya wastani linalotarajiwa katika eneo la pwani ya kusini mashariki mwa Bahari ya Atlantiki (Pwani ya Angola), linatarajiwa kupunguza nguvu ya msukumo wa hewa yenye unyevunyevu kutoka misitu ya Kongo kuelekea maeneo ya magharibi mwa nchi na yale yaliyopo ukanda wa kati. Kwa upande mwingine, joto la bahari katika eneo la kusini magharibi mwa Bahari ya Hindi (mashariki mwa kisiwa cha Madagascar) linalotarajiwa kuwa juu ya wastani katika baadhi ya nyakati, linatarajiwa kuchangia kutokea kwa migandamizo midogo ya hewa katika maeneo hayo, na kupelekea kuimarika kwa mifumo isababishayo mvua katika maeneo ya pwani ya kusini mwa nchi, nyanda za juu za kusini magharibi na maeneo jirani.

MWELEKEO WA MVUA ZA MSIMU NOVEMBA,2025 HADI APRILI 2026

Mvua za *Msimu* zinatarajiwa kuanza kati ya wiki ya tatu na ya nne ya mwezi Oktoba, 2025 katika mikoa ya Tabora, Katavi na Kigoma; na kusambaa katika mikoa ya Rukwa, Songwe, Mbeya, Iringa, Njombe pamoja na kusini mwa mkoa wa Morogoro kati ya wiki ya pili na ya tatu ya mwezi Novemba, 2025. Mvua hizi zinatarajiwa kuisha kati ya wiki ya nne ya mwezi Aprili na wiki ya kwanza ya mwezi Mei 2026 katika maeneo mengi. Kwa ujumla, Msimu unatarajiwa kutawaliwa na vipindi virefu vya ukavu na mtawanyiko wa mvua usioridhisha katika maeneo mengi.

Ongezeko la mvua linatarajiwa katika kipindi cha nusu ya pili ya msimu (Februari – Aprili, 2026) ikilinganishwa na nusu ya kwanza (Novemba, 2025 – Januari, 2026). Maelezo ya kina juu ya mwelekeo wa mvua hizo za msimu ni kama ifuatavyo:

Kanda ya Magharibi: (mikoa ya Tabora, Katavi na Kigoma):

Mvua za Chini ya Wastani hadi Wastani zinatarajiwa katika mikoa hii na zinatarajiwa kuanza wiki ya tatu na ya nne ya mwezi Oktoba, 2025 na kuisha wiki ya nne ya mwezi Aprili na wiki ya kwanza ya mwezi Mei, 2026.

Kanda ya Kati: (mikoa ya Singida na Dodoma):


Mvua katika maeneo haya zinatabiriwa kuwa za Chini ya Wastani hadi Wastani na zinatarajiwa kuanza wiki ya kwanza na ya pili ya mwezi Desemba, 2025 na kuisha wiki ya tatu na ya nne ya mwezi Aprili, 2026.

Nyanda za juu kusini magharibi (mikoa ya Rukwa, Songwe, Mbeya, Iringa, Njombe, pamoja na maeneo ya kusini mwa mkoa wa Morogoro):

Mvua za Wastani hadi Chini ya Wastani zinatabiriwa katika maeneo haya. Mvua zinatarajiwa kuanza wiki ya pili na ya tatu ya mwezi Novemba, 2025 na kuisha wiki ya nne ya mwezi Aprili na wiki ya kwanza ya mwezi Mei, 2026.

Pwani ya kusini na maeneo ya kusini mwa nchi: (mikoa ya Lindi, Mtwara na Ruvuma):

Mvua zinatarajiwa kuwa za Wastani hadi Chini ya Wastani katika mikoa hii. Mvua zinatarajiwa kuanza wiki ya kwanza na ya pili ya mwezi Desemba, 2025. Mvua zinatarajiwa kuisha wiki ya nne ya mwezi Aprili na ya kwanza ya mwezi Mei, 2026.



Kielelezo: Mwelekeo wa mvua za Msimu (Novemba 2025 hadi April 2026)

Angalizo 1: Izingatiwe kuwa matukio ya vipindi vya mvua kubwa yanaweza kujitokeza hata katika maeneo yanayotarajiwa kupata mvua za chini ya wastani.

ATHARI NA USHAURI

Kilimo, mifugo, uvuvi na wanyamapori

Maeneo mengi yanayotarajiwa kupata mvua za Chini ya Wastani yanaweza kukumbwa na upungufu wa unyevu wa udongo na uwezekano wa kuongezeka kwa wadudu waharibifu wa mazao kama vile panya na mchwa jambo ambalo linaweza kuathiri ukuaji na maendeleo ya mazao na kupunguza mavuno hususani kwa mazao yanayategemea mvua. Wakulima wanashauriwa kuandaa mashamba kwa wakati, kupanda, kupalilia na kutumia pembejeo husika kwa kuzingatia hali ya unyevu katika udongo, kutumia mbinu bora na teknolojia za kuhifadhi maji shambani na kuimarisha miundombinu ya kilimo na kudhibiti kwa wakati magonjwa ya mimea na wadudu

waharibifu ili kupunguza madhara yanayoweza kujitokeza. Vilevile, wakulima wanashauriwa kuendelea kufuatilia ushauri taarifa sahihi kutoka kwa maafisa ugani na kutumia utabiri wa siku na wa siku kumi ili kufuatilia kwa ukaribu mwenendo wa utabiri wa msimu.

Upungufu wa mvua unaotarajiwa katika maeneo mengi unaweza kuathiri upatikanaji wa maji na malisho ya mifugo, hali ambayo inaweza kusababisha migogoro kati ya wafugaji na watumiaji wengine wa ardhi. Wafugaji wanashauriwa kuweka na kutekeleza mipango bora ya matumizi na uhifadhi wa maji pamoja na vyakula vya mifugo. Aidha, wafugaji na wavuvi wanashauriwa kutumia taarifa za utabiri wa hali ya hewa na kuzingatia ushauri unaotolewa na maafisa ugani ili kupunguza athari zinazoweza kujitokeza na kuendelea kunufaika na hali ya hewa inayotarajiwa wakati wa msimu.

Upungufu wa mvua unaotarajiwa, unaweza pelekwa upungufu wa malisho na maji ya wanyamapori katika hifadhi za taifa na mapori ya akiba. Hali hii inaweza kusababisha migogoro kati ya wanyamapori na jamii zinazozunguka maeneo hayo. Wanyamapori wanaweza kuvamia makazi ya binadamu, hivyo kuongeza hatari ya maambukizi ya magonjwa kwa mifugo. Aidha, hali hii inaweza kuhatarisha usalama wa binadamu na wanyama wa kufugwa kutokana na mashambulizi ya wanyama wakali. Mamlaka husika zinashauriwa kuboresha miundombinu mbalimbali katika mbuga na mapori ya akiba na kujenga uelewa kwa jamii ili kuchukua hatua stahiki kutokana na athari zinazoweza kujitokeza.

Angalizo 2: Mwelekeo wa mvua uliotolewa umezingatia zaidi kipindi cha msimu (miezi mitatu) na hali ya mvua katika maeneo makubwa. Hivyo, viashiria vinavyochangia mwenendo wa mifumo ya mvua na mabadiliko ya muda mfupi katika maeneo madogo utazingatiwa katika uchambuzi wa utabiri wa muda wa kati na mfupi. Watumiaji wa taarifa hii wanashauriwa kufuatilia taarifa za utabiri wa saa 24, siku 10, mwezi na tahadhari kama zinavyotolewa na Mamlaka ya Hali ya Hewa Tanzania (TMA).